

vorsehunghalben, uch von vnserm heiligen vater dem babst geschehen. Vnde so eß die gestalt hat, das vnser heiliger vater der babst das zcutun hab, so ist vns sollich vorsehunge nicht weddir, gunnen uch des gar wol, so das vnser kirchen zcu Missen da durch an irem altherkommen vnd freiheit nicht kurtz noch abbruch geschehe. Weret ir nu gemeynt die techney der vorsehunghalben vch geschehen an uch zcubringen, so ist vnser vlissige begirung, ir wollit uch personlich heruß fugen, dieselbigen techney von dem capittel zcu fordern. So ir denne gnuglich recht vorbringen vnde geschickt werdet daruff zcu wanen vnde residiren, zewiueln wir nicht, vch werde von dem capittel gegunst vnnde gestat was recht ist, darczu ir vns auch beraten vnd behulffen zcu syn finden wurdet, wo es uwer nottorfft bedorfft. Wo ir abbir die ding in andir wise vornemen vnde das capittel der egnanten kirchen zcu Missen vnd den irwelten techant vngeborlicher wise antziehen wurdet, also denne die egnant kirch vnser vorfarn loblichir gedechnis alt gestifft ist, wolde vns wol fugen, dem egnanten capittel vnd irim irwelten techant zcu enthaldung ires recht friheit vnd gewonheit hulfflich vnd beystendig zcuirschynen noch irer nottorfft. Wir syn doch vngezwifelt, ir werdet selbst in die ding sehen vnde uch in dem allem also halden, das wir vnd die egnanten capittel vnd irwelter techant vor muhe vnd zcerung zcu der kirchen vnd techney recht friheit vnd gewonheit enthaldung vorhutt bliben. Daran tut ir vns dancknemen willen kein uch in allim guten zcubedencken. Gebin zcu Dreßden am dinstag nach Priscaë virginis anno domini ꝛ. LXX tertio.

Dem achtbarn ern Melchiar von Meckaw zcu Missen vnd Brixen thumhern bullenschreiber im hoff zcu Rome ꝛ. vnserm liben andechtigen vnd getruwen.

Nach gleichzeitiger Abschrift im K. Haupt-Staatsarchiv zu Dresden.

No. 1171. 1473. 24. Mai.

*Herzog Albrecht meldet dem Rathe zu Leipzig, dass er in ihrer Irrung mit dem B. Dietrich und dessen Capitel ihrem Abgeordneten befohlen habe, das in Meissen bereits liegende Geld auszahlen, die weitere Auseinandersetzung aber bis zur Rückkehr seines Bruders ausgesetzt bleiben müsse.*

Albrecht vonn gots gnadenn herezog zcu Sachssenn, lantgraue in Doringen vnnd marggraue zcu Missenn.

Libenn getruwenn. Also ir Benedictus Moller ewern ratsfrundt gefertiget habet in den sachen der gebrech, zo zcwuschen dem ernwirdigen ingotuater hern Ditterich bisschoue zcu Missen vnserm hern vnnd frunde vnnd seinem cappittel eins vnd uch des andern teils abelosunghalben eines vorkaufften zcinß vorhanden sey zcuhandeln, also haben wir vnns syder dem abschide von uch mit dem egnanten bisschoue vnnd seinem cappittel vnderreth, das ir das gelt, das ir zcu Missen verbunden vnd vorsigelt legen hat, den mehrgnanten hern dem bisschoff vnd cappittel obirzelen lassen vnd domit ewern briff ledigen sollet. Was vmb das nochgelt zcuirfolgung der widerung die sie fordern sein sal, haben sie mechtiglich uff vns gestalt, das wir denne außzcusprechin biß zcu vnser liben bruders zcukunfft bedacht genom-